

starogradske

OPĆINA STARI GRAD
SARAJEVO



MUNICIPALITY OF THE
OLD TOWN SARAJEVO

haberi

BESPLATAN PRIMJERAK • juni 2010. broj 6.

- **Otvaranje ulice Bravadžiluk**
- **Intervju: Nevzeta Mulalić**
- **Obilježen Dan Općine**
- **Predstavljamo MZ Širokača**

Počele
pripreme
za izgradnju
Bakr-babine
džamije



Sadržaj

- 2-3** Otvaranje ulice Bravadžiluk
- 4** Sporazum o saradnji sa Općinom Silivri, Istanbul
- 5** Ibrahim Hadžibajrić, načelnik u BiH
- 6-7** Intervju : Nevzeta Mulalić, pomoćnik načelnika za imovinsko-pravne, geodetske poslove i katastar
- 9** Pripreme za izgradnju Bakr-babine džamije
- 10-11** Starogradске ulice: sanacija i rekonstrukcija
- 12-14** Dani Općine Stari Grad
- 18** Predstavljamo Mjesnu zajednicu „Širokača“
- 23** 1001 starogradski biser: „Stara pravoslavna crkva“



Impressum

- Izdavač:** Općina Stari Grad Sarajevo
- Tiraž:** 2.000
- Pripremili:** Almedina Porča
Alma Imamović
Safet Mališević
Alija Ibrović
Džavid Katica
- DTP:** Pentagram d.o.o
- Fotografije:** Zijad Lokvančić
- Štampa:** DES d.o.o. Sarajevo
- Adresa:** Zelenih beretki br. 4
71000 Sarajevo
- web:** www.starigrad.ba
- e-mail:** info@starigrad.ba
- Tel./fax:** +387 33 282 385
+387 33 217 916

Svečanosti



Brojni gosti na otvaranju

Svečano otvorena ulica Bravadžiluk

Urađena kompletna infrastruktura: vodovodne, plinske, telefonske instalacije • Kafa i šerbe za sve prisutne

Svečano otvaranje saniране i rekonstruirane ulice Bravadžiluk, kojem su, uz brojne ugledne zvanice, prisustvovali gradonačelnik Sarajeva Alija Behmen i načelnik Općine Stari Grad Ibrahim Hadžibajrić, upriličeno je 20.maja 2010.godine.

Radovi na rekonstrukciji i sanaciji ulice Bravadžiluk počeli su 25.01.2010. godine i urađena kompletna infrastruktura: vodovodne, plinske i telefonske instalacije, uvedena je kablovska TV i internet, urađena oborinska kanalizacija, izvršeno spajanje oluka, postavljeni ivičnjaci, te

na kraju izvršeno popločavanje ulice, sa fugiranjem. Rok za završetak ovih rada bio je 75 kalendarskih dana, no Ugovor je naknadno proširen te je izvršeno asfaltiranje sporedne ulice Oprkanj i popločavanje ul. Mali Bravadžiluk. Radove je izvodila firma „Mibral d.o.o“.

Sredstva za ove radove izdvojio je Grad Sarajevo, a projekat je realizovala Općina Stari Grad. Naime, Grad je izdvojio dio sredstava za popločavanja Baščaršijskog trga. S obzirom na tešku finansijsku situaciju, nije uplaćena kompletan suma potrebna za popločavanje trga, tako da su sredstva, u dogовору s



Za stolom: Željko Ler, Ibrahim Hadžibajrić, Alija Behmen



Presijecanje vrpce: Behmen i Hadžibajrić

Gradom, preusmjerena za rekonstrukciju ulice Bravadžiluk. Vrijednost ovog projekta je 319.927,05 KM.

Bravadžiluk su, presijecanjem vrpce, svečano otvorili gradonačelnik Sarajeva Alija Behmen i načelnik Starog Grada Ibrahim Hadžibajrić.

Po završetku zvaničnog dijela, gradonačelnik Behmen i načelnik Hadžibajrić, sa svojim gostima, smjestili su se u kafe-slastičarnu „Sport“ u pomenutoj ulici, gdje im je u znak zahvalnosti za rekonstrukciju ulice u kojoj uspješno radi dugi niz godina, vlasnik Baftir Fidani uručio prigodne poklone, slike Baščaršije.

Svi gosti i posjetioci su na kraju počašćeni kafom, rahatlokumom i šerbetom, a za dobru atmosferu se pobrinuo sazlijia Avdo Lemeš.

Otvaranju ulice Bravadžiluk prisustvovali su podpredsjednica FBiH Spomenka Mičić, bivša gradonačelnica Sarajeva Semija Borovac, predsjedavajući Gradskog vijeća Grada Sarajeva Željko Ler, predsjedavajući Općinskog vijeća Stari Grad Rizah Avdić, vijećnici Gradskog vijeća Sarajeva, vijećnici Općinskog vijeća Stari Grad, pomoćnici načelnika, predstavnici boračkih udruženja i brojni drugi gosti.



Cvijeće za Semiju Borovac



Druženje u kafe-slastičarni „Sport“



Posluženje za sve prisutne



Sazlija Avdo Lemeš

Posjete

Bratimljenje sa Općinom Silivri Belediyesi - Istanbul



U posjeti Općini Stari Grad, od 04-07.06.2010. godine boravila je delegacija Općine Silivri Belediyesi, Istanbul, Republika Turska. Cilj ove posjete bio je bratimljenje dvije općine. Tim povodom, u Sali za vjenčanja Općine Stari Grad, 04.06.2010.



godine, uz veliki broj gostiju iz Turske, te pomoćnike i savjetnike načelnika Hadžibajrića, upriličeno je svečano potpisivanje Sporazuma o saradnji dviju općina.

Polazeći od civilizacijske potrebe

ostvarivanja prijateljstva, saradnje i uvažavanja ljudi, naroda, gradova i država, Općinsko vijeće Stari Grad je na sjednici održanoj u decembru 2009. godine donijelo Odluku o sklapanju Sporazuma o saradnji između ove dvije općine.

Sporazum su potpisali načelnik Općine Stari Grad Ibrahim Hadžibajrić i načelnik Općine Silivri-Belediyesi Odžan Išiklar.

Podsjećajući da su naši djedovi četiri vijeka živjeli na ovim prostorima u miru, bratstvu, ljubavi i prijateljstvu, načelnik Išiklar je rekao:

„Čast mi je da Vam u ime građana Silivrija prenesem najiskrenje pozdrave. Nadam se da će naše bratstvo trajati dok svijet postoji.“

Obaveze Sporazuma

Ovim svečanim dokumentom potpisnice Sporazuma se obavezuju, da na osnovama istinskog međusobnog uvažavanja, trajno uspostavljaju različite oblike saradnje, razmjenu ideja o realizaciji projekata od zajedničkog interesa u oblastima privrede, kulture, obrazovanja, turizma, sporta, zaštite prirodnog i kulturnog nasleđa.

Također, obavezuju se da doprinose razvoju i jačanju lokalnih zajednica, te da organizuju zajedničke sastanke, seminare, susrete, kulturno-sportske manifestacije itd.



Priznanje za konkretnе rezultate rada

Ibrahim Hadžibajrić izabran za Najnačelnika Općine u BiH

Agencija za izbor najmenadžera BiH, Jugoistočne i Srednje Evrope, po odluci žirija sastavljenog od najuglednijih menadžera i naučnih radnika iz regionala, u izboru za „Menadžera godine“, proglašila je načelnika Općine Stari Grad, Ibrahima Hadžibajrića, Najnačelnikom Općine u BiH.

Radi se o izuzetno visokom i međunarodno verifikovanom priznanju ove nezavisne agencije, odnosno privrednika regionala, Evropskog udruženja menadžera i časopisa Euromanager. Agencija za izbor i promociju je jedini globalni i nezavisni autoritet na području regionala jugoistočne i srednje Evrope, koja ovu nagradu dodjeljuje po dvadeset drugi put, a svrstana je ravnopravno sa sedam najrespektabilnijih nagrada u svijetu (Njujork, Pariz, London, Rim, Ciriš, Madrid i Brisel).

Priznanje se dobija za rezultate koje je menadžer postigao u praksi gdje su vidljivi konkretni rezultati rada, a namijenjeno je menadžerima i kompanijama koji svoju državu i regiju „vuku“ naprijed u razvoju.

Neki od ranijih dobitnika

Nijaz Hastor (Asa Prevent Group), Ivica Todorić (Agrokor), Peter Schmid (Austrotherm), Berislav Kutle (UniCredit Bank), Edin Muhamedović (FDS), Marek Varhol (Atlantic Co.) Zoran Janković (gradonačelnik Ljubljane), Milan Bandić (gradonačelnik Zagreba), Trifun Gostovski (gradonačelnik Skoplja), Željko Mitrović (Pink Media Group), Siniša Svilan (Nova TV Zagreb) i drugi.

Direkcija dodjeljuje tridesetak nagrada, od toga i ljudima koji nisu direktno u biznisu, ali stvaranjem ambijenta uveliko doprinose njegovom razvoju. U ovu kategoriju spadaju i načelnici Općina, ministri, predsjednici privrednih i obrtničkih komora, te ljudi iz nauke, kulture, sporta i medija. U ovoj kategoriji načelnik Ibrahim Hadžibajrić je dobitnik NAJVEĆEG priznanja, Najnačelnik Općine u Bosni i Hercegovini.

Dodata priznanja upriličena je 01.jula u botaničkoj bašti Zemaljskog muzeja u Sarajevu, nakon čega je uslijedila svečana večera i bal menadžera u hotelu Holiday Inn.

Priznanje je motivacija i obaveza

„Naravno da mi imponuje ovako veliko priznanje, prije svega zato što dolazi od strane međunarodnog žirija kojeg čine najugledniji menadžeri iz regionala i što je to znak da su prepoznati naši napor da promjenimo stvari nabolje u Općini Stari Grad. Svjestan sam da je ovo priznanje ujedno motivacija i obaveza za još veći angažman, trud i rad u budućim vremenima,“ riječi su načelnika Hadžibajrića

Rješavanje imovinsko-pravnih odnosa problem star vijekovima

Ova oblast je izazov za svakog pravnika • Posao je zahtjevan i za ženu i za muškarca, ali ne smatram da je ovo „muški“ posao

Nevzeta Mulalić je rođena 1962. godine. Završila je Pravni fakultet u Sarajevu 1984. godine nakon čega je radila u Osnovnom sudu I, gdje je obavljala pripravnički staž u trajanju od dvije godine. Nakon toga je dvije godine radila kao sekretar Srednje zubotehničke škole. U Općini Stari Grad radi od 13. januara 1993. godine. Bila je angažovana u Službi za stambene poslove, potom u tadašnjem Izvršnom odboru, zatim u Pravnoj pomoći, u Kabinetu načelnika, u Odsjeku za personalne poslove, te u Službi za boračko-invalidsku zaštitu. Posao pomoćnika načelnika u Službi za imovinsko-pravne, geodetske poslove i katastar obavlja od 1. oktobra 2009. godine.

Izazov za svakog pravnika

Prva radna iskustva u Općini?

Prva radna iskustva Općini Stari Grad ujedno su bila i moja prva iskustva u jednom organu uprave. Radila sam u Pravosudu i Obrazovanju, a potom u Službi za stambene poslove. Pamtim taj period kao izuzetno težak s obzirom da je to bilo vrijeme dodjeljivanja stanova, deložacija i svega vezanog za tu problematiku, tako da se puno radilo i obavljao izuzetno težak i zahtjevan posao. Osim toga, naše stranke su tada bili uglavnom pripradnici Armije i šehidske porodice sa kojima se moralo pažljivo postupati. U toj



Nevzeta Mulalić u radnom ambijentu

službi sam radila 4 godine i bilo je to veliko iskustvo za mene.

Od 01. oktobra 2009. godine ste pomoćnik načelnika za imovinsko-pravne, geodetske poslove i katastar. Da li ste ovaj posao prihvatile kao izazov?

Pa, ova oblast je izazov za svakog pravnika, ali je vrlo specifična i teška.

Rad u izvršnom odboru

Kako pamtite rad u Izvršnom odboru?

U Općini je tada bilo 50-ak uposlenih, a Izvršni odbor je zasjedao svake sedmice i donosio zaključke o tome šta koja služba treba da radi. Općina je tada bila potpuno drugačije uređena i odbor je imao dosta posla. Poslije toga sam radila u Odsjeku za personalne poslove, u periodu kada je počelo zapošljavanje ljudi i obim posla je bio izuzetno veliki. Čini mi se da sam imala tu „nesreću“ da u svaku službu dođem kada u njoj ima najviše posla. Kasnije sam raspoređena u Službu za socijalnu zaštitu gdje sam radila kao Šef Odsjeka za socijalnu i zdravstvenu zaštitu.

Da li ste se plašili prihvatanje ove obaveze?

Bila sam vrlo iznenadena kada sam raspoređena na ovo radno mjesto i zaista to nisam očekivala. Na sve sam mogla računati osim na Službu za imovinsko-pravne poslove, a kada sam dobila Rješenje shvatila sam da nema tog posla koji se ne može naučiti i dobro obavljati. Upravo tako sam pristupila ovom poslu jer sam duboko uvjerenja da se sve može naučiti, svaki problem savladati i da niko od nas nije nezamjenjiv. Radim u upravi dugo, skoro 20 godina, tako da znam kako uprava funkcioniše i već ranije sam donosila rješenja, vodila upravne postupke, radila drugu vrstu poslova koji nisu upravni postupci, itd.

Kako ste se suočili sa poslom koji Vas je dočekao u Službi?

Prije svega, moram naglasiti da svoju radnu ekipu, svoje saradnike, znam dugi godine i to mi je umnogome olakšalo

posao. Svako radi na svoj način, tako da je sasvim normalno što sam unijela neke novine u Službu. Prvenstveno, rješili smo neke tehničke stvari, kao npr. vođenje predmeta kroz server. Problem sa kojim sam se na početku suočila je bio taj da nisam mogla dobiti određene podatke od uposlenika jer nisu bili uključeni u velike projekte. Prethodni pomoćnik je određene projekte radio kvalitetno, ali samostalno, tako da je njegovim prelaskom

Rad u izvršnom odboru

Bili ste član ISO tima i dobili zahvalnicu za Vaš angažman?

Ovo je već drugi put da Općina Stari Grad dobija certifikat za ISO standard i ja sam imala tu sreću da sam bila član ISO tima oba puta. Prvi put smo radili puno više i ogroman posao smo ponijeli na svojim ledima, ali, nažalost, taj certifikat nije obnovljen i izgubili smo ga. U drugom krugu dobijanja certifikata tim je bio manji, ali nam je sve bilo lakše što je možda i stvar iskustva koje smo ponijeli iz tog prvog kruga. S obzirom da smo dobili zahvalnice, znači da smo dobro uradili posao.

na drugo radno mjesto bilo teško doći do informacija. Međutim, vremenom smo prevazišli sve probleme.

Kako sada radi Služba?

Projekat rješenosti predmeta u Službi za imovinsko-pravne poslove u 2009. godini je oko 93% i ovi rezultati najbolje pokazuju kako radimo. Moram pohvaliti svoju ekipu, jer zaista radimo puno i Služba nikad nije bolje radila. Dobri saradnici i njihov odnos prema poslu su osnov uspješnog rada.

Služba nikada nije bolje radila

Problemi sa strankama?

Sa strankama uvijek može biti problema i to isključivo zbog njihovog načina razmišljanja. Naime, većina stranaka zna da je zakonski rok za okončanje dva mjeseca i u tom roku očekuju da dobiju rješenje. Međutim, mnogo je izuzetaka, kao npr. kada stranka preda nepotpun zahtjev prođe još 10-ak dana do upotpune zahtjeva čime se taj rok produžava. Osim toga, u ovoj službi ima jako puno uključenja u postupak tako da se moraju uskladiti termini advokata, izlasci na teren geometara ili urbanista i sl. Znači, mnogo je faktora koji se moraju ispoštovati, ali



Upozlenici Službe za imovinsko-pravne, geodetske poslove i katastar

se uvijek trudimo da ispoštujemo zakonski rok, što je i potvrđeno kada je vršena certifikacija u ovom organu uprave.

Imovinsko-pravni odnosi su vrlo kompleksan problem u Starom Gradu. Nazire li se konačno rješenje?

Zemlja je čudo i rješavanje imovinskih-pravnih odnosa je problem star vijekovima. Koliko ste puta čuli da su se ljudi zbog međe ranjavali i ubijali? To je vrlo kompleksan problem, a mentalitet naših ljudi je vrlo specifičan. Mnogo ljudi je izgradilo objekte bez dozvola, znači nezakonito. Kada se provodila legalizacija objekata rađena je u tri navrata. Radila se legalizacija bespravno izgrađenih objekata gdje su se zbog specifičnosti Starog Grada pojavili brojni problemi. Naime, u Starom Gradu su brojne mahale gdje je

izgrađena kuća do kuce, bez nekog regulacionog plana, već je gradio kako je ko htio i sad se to legalizuje. To je postupak koji će trajati dugo i oni koji nisu podnijeli zahtjev za legalizaciju objekta sada čekaju da Kanton ponovo doneše takvu odluku pa da se i oni uključe u postupak legalizacije. Mislim da će se imovinsko-pravni odnosi rješavati dok je svijeta i vijeka.

Zahtjevan posao

Da li je teže ženi na ovakovom položaju?

Smatram da smo mi, žene, izuzetno sposobne i vrijedne tako da ne mislim da nam je teže na ovakvim položajima. Posao je zahtjevan i za ženu i za muškarca, ali ne smatram da je ovo „muški“ posao.

Koliko traje Vaš radni dan i da li porodični život ispašta zbog toga?

Moj radni dan traje, u pravilu, od 8.00- 16.00h, pauzu rijetko koristim, a stranke nikada ne vraćam bez obzira na vrijeme. Kada su sjednice vijeća ili klubova, odnosno neki važni sastanci, onda ostajem na poslu i poslije radnog vremena.

Redvno održavamo kolegije u službi, pauze za kafu traju vrlo kratko i to je razlog zašto izvršavamo sve svoje zadatke na vrijeme. Smatram da je najvažnije isplanirati vrijeme i obaveze. Ko ne zna isplanirati svoj radni dan, ne zna isplanirati ni privatni život.

Jeste li zadovoljni odnosom sa kolegama i nadređenim?

Imam izuzetno dobru saradnju sa svim kolegama pomoćnicima, savjetnicima, a na prvom mestu sa Načelnikom.



Izuzetno dobra saradnja sa kolegama

Općinsko vijeće

16. sjednica

Općinskog vijeća

Nakon usvajanja dnevnog reda, sa kojeg je prethodno povučen Prijedlog odluke o dodjeli u zakup poslovnog prostora u ulici Prote Bakovića br.8/1 zbog dodatnih razmatranja, 29. marta 2010. godine održana je 16. sjednica Općinskog vijeća Stari Grad.

Većina tačaka dnevnog reda usvojena je jednoglasno. Izvještaj o radu Pravobranilaštva Općine Stari Grad Sarajevo za 2009. godinu usvojen je uz Zaključak da Služba za privredu, u saradnji sa Pravobranilaštvom Općine Stari Grad, pripremi Prijedlog odluke za bri-sanje-otpis potraživanja iz evidencije organa, što će

onda biti upućeno u Kabinet Načelnika. Općinsko vijeće je usvojilo Prijedlog Odluke o dodjeli u zakup poslovnog prostora u ulici Nalina bb, kojom se devastirani prostor površine 442,37 m² dodjeljuje u zakup Privatnoj osnovnoj školi „Blooming Child“ i privatnoj Predškolskoj ustanovi „Blooming Child“. Također, vijeće je usvojilo Prijedlog

Odluke o dodjeli u zakup poslovnog prostora u ulici Gazihušrev-begova br. 69; površine 20m² Muslim Safetu i Prijedlog Odluke o dodjeli u zakup poslovnog prostora u ulici Fra Grge Martića br.2/IV, površine 27 m² „Fidan“ d.o.o. Sarajevo.



*Općinski pravobranilac
Saada Hadžić*

18. sjednica

Općinskog vijeća

Na 18. sjednici Općinskog vijeća Stari Grad Sarajevo, koja je održana 27. maja 2010. godine, usvojene su sve tačke dnevnog reda, osim Prijedloga Odluke o izmjenama i dopunama Odluke o dodjeli i prodaji stanova koji je vraćen na doradu. Usvojen je nacrt odluke o usvajanju UP „Katedrala – Spomen obilježe Papi Ivanu Pavlu II“, dok je nacrt Odluke o provođenju UP „Katedrala - Spomen obilježe Papi Ivanu Pavlu II“ usvojen uz zaključak da se spomenik dislocira u pravcu sjevera, prema objektu Katedrale, a javna rasprava je zakazana za 15 dana. Prema prijedlogu Vrhbosanske nadbiskupije spomen-obilježje bi trebalo biti postavljeno na Trgu ispred Katedrale, na udaljenosti od 12,5 metara, ali neki vijećnici se nisu složili sa ovom udaljenošću jer smatraju da bi spomenik trebao stajati bliže Katedrali. Vijećnik BPS-a Nermin Bjelak je istakao da ova stranka neće prihvati UP koji predviđa spomen-obilježje



Almedin Miladin

17. sjednica

Općinskog vijeća

Na 17. sjednici Općinskog vijeća Stari Grad, održanoj 28. maja 2010. godine, utvrđen je datum održavanja svečane sjednice Općinskog vijeća u povodu Dana Općine. Iako je Dan Općine, 02. maj, svečana sjednica zakazana je za 18. maj 2010. Kako je pojasnio predsjedavajući Općinskog vijeća, Rizah Avdić, na taj način su obuhvaćena dva značajna datuma za ovu Općinu: 18. godišnjica postrojavanja 1. brigade policije Stari Grad i Dan Općine. Načelnik Ibrahim Hadžibajrić se na početku obratio informacijom o visini sredstava koje je Općina uložila u osnovne škole na području Starog Grada, naglasivši da su netačne insinuacije da Općina ne pomaže školama i da to najbolje potvrđuje spisak ulaganja objavljen na općinskoj web stranici, prema kojem je u prošlog godini izdvojeno cca 1,5 miliona KM. Početak sjednice iskoristio je i za uručenje priznanja Vatrogasnog saveza koji se zahvalio Načelniku za doprinos u razvoju vatrogastva kroz pomoć Vatrogasnom društvu „Vratnik“. Priznanje za dobru saradnju uručeno je i Službi za civilnu zaštitu. Također, Načelnik i Općinsko vijeće su dobili zahvalnice i od karate kluba „Stari Grad“. Prije usvajanja tačaka dnevnog reda, novoizabrani zamjenik pravobranioca Rešad Jusupović, položio je zakletvu. Na 17. sjednici Općinskog vijeća usvojen je Prijedlog Odluke o dodjeli priznanja Općine Stari Grad.



Rešad Jusupović

na pomenutoj udaljenosti, ali da nema ništa protiv njegovog postavljanja na drugoj lokaciji, bliže Katedrali. Vijećnik SDA Almedin Miladin je predložio da se spomenik dislocira. Inače, idejno rješenje spomen-obilježja papi Ivanu Pavlu II je rad akademskog kipara Hrvoja Urumovića i, prema njemu, ispred Katedrale će biti postavljena skulptura visine 2,92 metra, u uspravnoj figuri Pape u meditativnoj molitvi. Materijal od kojeg će spomenik biti izgrađen je segetski kamen, otporan na vremenske prilike i udarce. Na Javnoj raspravi, održanoj 14.06.2010. godine, prisutni su izrazili neodobravanje, govoreći da je

postavljanje spomen-obilježja na pomenutoj lokaciji provokacija i tražeći poništavanje odluke o postavljanju.

Zaključeno je da prethodno spomenuta odluka OV, kao i zaključci sa Javne rasprave budu upućeni Zavodu za planiranje razvoja Kantona Sarajevo.

Priča sa naslovne strane

Počele pripreme za izgradnju Bakr-babine džamije

**Džamiju je podigao Hadži Alija Bakrbaba 1544.godine, a spasio
Eugen Savojski • Izgradnju finansira turski grad Bursa**

Počeli su pripremni radovi na izgradnji Bakr-babine džamije koje će u potpunosti finansirati turski grad Bursa.

Delegacija Bursa, predvođena gradonačelnikom Redžepom Altepe, položila je kamen-temeljac za izgradnju Bakr-babine džamije u oktobru prošle godine.

Nakon dobijene saglasnosti od Ministarstva za zaštitu okoliša FBiH, na lokalitetu arheološkog parka gdje će se graditi Bakr-babina džamija, počela su arheološka iskopavanja, radi utvrđivanja stanja na terenu. Ispitivanja arheološkog parka su preduslov da bi se mogao napraviti izvedbeni projekat.

Prema riječima, projektanta, arhitekte Mufida Garibije, iskopavanja vrši firma Al Inžinjering, zajedno sa Udrženjem 1894, koji rade arheološka ispitivanja. „Izvedbeni projekat Bakr-babine džamije je gotov, a sada je potrebno završiti izvedbeni projekat za preostali dio parka,“ riječi su Garibije.

Preduslov za dobijanje urbanističke dozvole bilo je odobrenje Komisije za očuvanje nacionalnih spomenika Bosne i Hercegovine koje je dobijeno.

Nakon izrade projekta slijedi izrada

građevinske dozvole, a potom uporedna gradnja džamije i parka.

U neposrednoj blizini mosta Čumurije, na lijevoj obali Miljacke, bila je džamija koja se zvala džamija Bakrbabe hadži-Alije, a narod ju je zvao još i Bakr-babina džamija na At međdanu. Džamiju je podigao Hadži Alija Bakrbaba 1544. godine. Džamija Bakrbabe hadži-Alije prostorno je spadala među veće i ljepše džamije grada.

Godine 1697. se urušila prilikom paljevine, a u pohodu na Sarajevo Eugen Savojski je spasio Bakr-babinu džamiju zajedno sa svim sarajevskim džamijama. Temeljito je obnovio hadži Mehmed Medbesarović, da bi poslije okupacije Austro-Ugarske 1878. godine džamija pretvorena u vojno skladište, te nakon toga 1895. godine srušena zajedno sa munarom, mektebom, medresom i kutubhanom.

Ostali su samo temelji džamije, zidovi džamajskog harema i mezaristan, da bi nedugo iza toga čitav ovaj kompleks bio zatrpan zemljom kao da nije nikad postojao. Zapisano je da je 1939. godine mezaristan ekshumiran, što su arheološka iskopavanja demantovala.

Kvadrant XII – najveći investicioni projekt Općine!

Radovi na izgradnji Kvadranta XII, budućeg poslovnog objekta i najvećeg investicionog projekta Općine Stari Grad, koji se nalazi između ulice Mula Mustafe Bašeskije i Dženetića čikme, počeli su 01.juna. Tog dana, izabrani nadzorni organ Window.Arh. Design, izvođača je uveo u posao i otvorio građevinski dnevnik u koji je uveden prvi zapis, što je označilo početak radova. Podsjecamo, izvođač radova je „Unigradnja“, geomehanička istraživanja jame vršila je firma „Winner“, za geodetski monitoring zadužena je firma „AMG“, projektant građevinske jame je firma „Shevron“, a projektant konstrukcije je „Hadžiabdić“. Investitor projekta je Općina Stari Grad.

Kvadrant 12 (poznat kao „Ceker pijaca“) je zamišljen kao interpolacija između dvije postojeće zgrade; imaće suteren, međuetažu, prizmlje, dvije etaže i potkrovљe, a konstrukcijski će pratiti fasade okolnih objekata kako bi se uklopio u ambijent Starog Grada. Kvadra-



Budući izgled Kvadranta XII

tura objekta je oko 2000 m², a predviđen je i manji parking iz dijela ulice Dženetića čikma. Unutar Kvadranta će biti poslovni prostori različitih struktura i veličina. Veći dio prostora biće iskorišten za prodajni prostor: supermarket sa skladištem i podrumom, servisnim dijelovima itd.

Investitor ovog projekta je Općina Stari Grad, a vrijednost je između 2,5 i 3 miliona maraka.

Počela izgradnja saobraćajnice Trčivode

Radovi na izgradnji dijela saobraćajnice u ul Trčivode u dužini od 227 metara (od ul Nalina prema ul Trčivode), počeli su, kako je i planirano, 01.juna.

Izvođač radova je firma „Sarajevoputevi“ dd Sarajevo. Riječ je o izgradnji potpuno nove saobraćajnice, a radovi koji će biti izvršeni su: iskop zemlje sa utovarom i odvozom, izrada nasipa od iskopanog materijala ili materijala iz pozajmišta, betoniranje potpornog zida na jednom dijelu trase, izrada odvodne kišne kanalizacije, izrada tampona i asfaltiranje. Rok za završetak radova je 60 radnih dana. Vrijednost projekta je 315.888,50KM, a investitor je Općina Stari Grad i Ministarstvo prostornog uređenja.

Radovi na Staroj pravoslavnoj crkvi

Općina Stari Grad je finansirala čišćenje ogradnog zida na južnoj strani kompleksa Stare pravoslavne crkve (površine 91,98 m²) i južne fasade zida muzeja prema ul. Mula Mustafe Bašeskije (površine 212,80 m²).

Površine zidova su očišćene suhim ledom, pri temperaturi od -79,5 C, čime su istovremeno sterilizirajne i dezinficirane. Ovakva tehnika sprječava vezivanje čestica prašine i nečistoća za duži vremenjski period, znatno duže nego kada na površini ostaju tragovi sredstava za čišćenje. Osim toga, u toku je sanacija požarom oštećenih prostorija uz Crkvu, koje dijelom finansira Općina.

Podsjecamo, 06.maja ujutro, u 08:55 sati izbio je požar na krovu pomoćnih prostorija uz Staru pravoslavnu crkvu koji je brzom reakcijom Profesionalne vatrogasne brigade Sarajeva i DVD „Vratnik“ lokalizovan. U požaru nije bilo stradalih, ali je pričinjena materijalna šteta.

Sanacija ulica

Mali Bravadižluk

Nakon Velikog bravadižluka i Mali je dobio novo ruho. Podsjećamo, ova ulica je trebala biti sanirana i asfaltirana u sklopu radova u ulici Bravadižluk.

Međutim, u želji da umjesto asfaltiranja bude urađeno popločavanje, što iziskuje znatno veće finansijske troškove, radovi su prolongirani i nastavljeni su nakon što su obezbijedena sredstva. Radove je izvodila ista firma koja je radila sanaciju i rekonstrukciju Bravadižluka, kao i sanaciju Ferhadije, Mibral d.o.o.

U Malom Bravadižluku je izvršeno postavljanje betonske podlage i kamenih ivičnjaka, izdizanje šahtova, slivnika, nivelišanje, te postavljanje kamenih ploča. Vrijednost radova je 62.000,00KM.

Kovači

Završena je sanacija kolovozne konstrukcije u ulici Kovači. Na dionici od 100 m² urađen je iskop postojeće ulegnute granitne kocke, te izdizanje slivnih rešetki i vodenih šibera na potrebnu visinu. Nakon pripremljene podlage, radnici KJKP „Rad“ ugradili su granitne kocke u sloju pijeska. Realizaciju ovog projekta u iznosu od 6.416,75 KM finansirala je Općina.

Aščiluk

Ulica Aščiluk zasjala je u novom sjaju. Sanacija je počela početkom aprila, ali su radovi trajali nešto duže, zbog zahtjeva kompanija BH Telecom i Sarajevogasa za dodatnim radovima, koje su oni finansirali. Na cijeloj dionici ulice Aščiluk urađeno je preslaganje ivičnjaka, postavljeni su novi trotoari i slivnici, skinut donji dio asfalta koji je bio oštećen, poravnata, nabijena i pripremljena podloga, a nakon toga asfaltirana površina. Realizaciju ovog projekta u iznosu od 33.108,66 KM finansirala je Općina, a izvođač radova bio je KJKP „Rad“.

Vrbanjuša


Sanacija kolovozne konstrukcije u ulici Vrbanjuša (dionica od ul. Sagrdžije do ul. Budaković), dužine 381 metar, a širine od 4,90 do 11 metara, završena je u maju. Radilo se zasijecanje ivica asfalta, ručni iskop oštećenog asfalta, vadenje oštećenih ivičnjaka i ugradnja novih, izrada nosećih slojeva materijala, izrada izravnjavajućeg sloja asfalta, izdizanje slivnih rešetki i vodovodnih šibera na potrebnu visinu, te postavljanje novih šahtova. Za asfaltiranje ove ulice utrošeno je više od 400 tona asfalta. Vrijednost radova je 101.828,61 KM i snosila ih je Općina.

Abadžiluk

Početkom maja Općina je finansirala sanaciju ulice Abadžiluk, koja se nalazi na raskrsnici ulica Čurčiluk, Kundurdžiluk, Abadžiluk. Na pomenutom dijelu, sanirana je površina, postavljene su i izdignute slivne rešetke, napravljen nagib, nakon čega je asfaltirana oštećena saobraćajnica. Realizaciju projekta u iznosu od 5.850,00 KM finansirala je Općina, a radove izvodio KJKP „Rad“.

Starogradske ulice

Uredili smo Ferhadiju



Zamjenjene polomljene ploče u Ferhadiji

Firma "Mibral" d.o.o. Sarajevo izvršila je sanaciju i zamjenu polomljenih ploča u Ferhadiji. Naime, uslijed vremenskih i drugih uslova, došlo je do lomljenja i pucanja kamenih ploča, čime je u velikoj mjeri bila onesposobljena šetačka zona ove ulice. Radovi na sanaciji Ferhadije su počeli 28. aprila i odvijali su se u dvije faze. Tokom prve faze zamjenjene su ploče na dijelu Manga-Slatko čoše, a tokom druge faze radovi su se odvijali na dijelu od Manga do Apoteke koja se nalazi na raskrsnici ulica Fra Grge Martića, Ferhadije i Štrosmajerove.

Završeno krpljenje rupa u devet ulica

Općina je sa KJKP „Rad“ u aprilu postigla dogovor za sanaciju i krpljenje udarnih rupa na području Starog Grada. Završeno je krpljenje udarnih rupa u ulicama Poddžephana, Jekovac, Žepa, Sumbul česma, Miščina, Saburina, Despića, Alifakovac i Mehmeda Mujezinovića. Vrijednost ugovorenih radova je 5.098,86 KM.

Više od 300 000 KM za asfaltiranje

Direkcije za puteve Kantona Sarajevo i KJKP „Rad“ potpisali su Ugovor o sanaciji kolovozne konstrukcije na tri saobraćajnicama u Starom gradu. Riječ je o sljedećim ulicama:

- ulica Sedrenik, dionica od mosta do puta za Barice u dužini od 488 metara, vrijednost investicije cca 100.000,00KM

- ulica Sarajevskih Gazija, dionica od raskrsca sa ul. Zmajevac prema spoju sa ul. Baruthana u dužini od 480 metara, vrijednost investicije cca 100.000,00KM

- ulica Šumarska, uređenje i asfaltiranje makadamskog puta, dva kraka: dionica od ulice Hambina carina do ulice Brajkovac u dužini od 470 metara, vrijednost investicije 77.370,00KM i od ulice Brajkovac do Motela „Osmice“ u dužini od 290 metara, vrijednost investicije 48.071,00KM

Preostale još dvije ulice za uređenje

Općina Stari Grad i Direkcija za ceste Kantona Sarajevo, potpisali su Ugovor sa KJKP „Rad“ o izvođenju radova na ljetnom održavanju cesta na području Kantona Sarajevo za period od 15.03.-15.11.2010. godine.

Radovi na sanaciji udarnih rupa počeli su u aprilu, a do sada je završena sanacija u ulicama: Glodina, Safvet Bega Bašagića, Ispod Budakovića, Arapova, Očaktanum, Mačkareva, Goloderica, Garaplina, Mahmutovac, Močila i Hambina Carina. U okviru ugovora ostale su još ulice Bakije sokak i Huremuša, koje će se sanirati u toku ovog mjeseca. Vrijednost radova je 86.860,56 KM i snosi ih Općina.

Novi rukohvati u ulicama Isa-bega Ishakovića, Sagrdžije i Mali sokak

Postavljene su nove rukohvatne ograde u ulicama Mali sokak, Sagrdžije i Isa-bega Ishakovića. Radnici firme Librag d.o.o. izradili su i montažirali željeznu rukohvatnu ogradu, dužine 8 metara, u ul. Sagrdžije, te 8,5 metara dužine, u ulici Isa-bega Ishakovića. Firma

Fadž Company postavila je rukohvatnu ogradu, dužine 50 metara, u Malom sokaku. Ovim rukohvatnim ogradama, uveliko je olakšano kretanje starijim osobama i djeci, a posebno u zimskom periodu. Realizaciju projekta u iznosu od 3.871,00 KM, finansirala je Općina Stari Grad.

Poljoprivreda

Uzgoj paradajza i paprika

U cilju poboljšanja poljoprivredne proizvodnje na području Starog Grada, proveden je projekt uzgoja paradajza i paprika. U mjesnim zajednicama su postavljene obavijesti za sve zainteresovane da se prijave za učešće. Glavni kriterij za prijavljivanje bio je da poljoprivredni proizvođač ima raspoloživu zemljišnu površinu sa plastenikom površine najmanje 100m², za uzgoj osnovnih kultura kao što su paradajz i paprika. Zainteresovanost je iskazalo 26 poljoprivrednih proizvođača, tako da je u tu svrhu prema raspoloživoj zemljišnoj površini korisnika i površini plastenika, dato 15.100 komada sadnog materijala. Realizaciju kompletnog projekta u iznosu od 10.000,00 KM finansirala je Općina.



Paprike i paradajz u plasteniku

Podizanje šljivika i proizvodnja šljive

„Podizanja šljivika i proizvodnje šljive“ je još jedan u nizu projekata Općine Stari Grad sa ciljem pokretanja mini proizvodnje.

U sklopu projekta podijeljeno je 550 komada sadnica šljive i zaštitnih mreža za sadnice. Namjera je kroz projekt obnoviti šljivarski fond sa sortama koje tolerišu prisustvo virusa šarke šljive i mogućnost prerade šljive na poljoprivrednom gospodarstvu. Svi zainteresovani za uzgoj šljivika i proizvodnju šljive prema raspoloživoj zemljišnoj proizvodnji dobili su sadni materijal. Vrijednost projekta je 1.870,00 KM, a finansirala ga je Općina.

Jagodičasto voće u Starom Gradu



Uzgoj jagoda u Starom Gradu

Pored projekata uzgoja šljiva, paprika i paradajza, Općina je provela i projekt uzgoja jagodičastog voća. Glavni kriterij za prijavljivanje bio je da poljoprivredni proizvođač ima raspoloživu zemljišnu površinu za uzgoj visokožbunaste borovnice, maline i jagode. Na području Općine veće zemljišne površine imaju samo MZ „Širokača“, „Mošćanica“, „Sedrenik“ i „Hrid-Jarčedoli“, tako da je obavijest za prijavljivanje postavljena samo u tim MZ. Za uzgoj jagodičastog voća zainteresovanost su iskazala četiri proizvođača, tako da je u tu svrhu prema raspoloživoj zemljišnoj površini korisnika dato 780 komada visokožbunastih borovnica, 180 malina i 334 jagode. Realizaciju kompletnog projekta u iznosu od 5.000,00 KM finansirala je Općina.



Ispod oraha

Izgradnja zida u ulici Ispod oraha

Završena je izgradnja kamenog zida u ulici Ispod oraha, koji se obrušio zbog jakih oborinskih voda, dotrajlosti i starosti. Radnici građevinske firme „BOSMAN“ d.o.o Sarajevo, izdali su porušeni kameni dio dužine 7,5 metara, te dozidali novi u dužini od 16 metara. Pri izgradnji zida vodili su računa o njegovoj autentičnosti s obzirom da se nalazi u staroj gradskoj jezgri, na Vratniku. Zid je građen od istog kamena koji je i ranije korišten. Vrijednost ovog projekta je 7.670,00 KM, a finansirala ga je Općina Stari Grad.

Ograda oko džamije u ulici Nalina

Postavljena je nova metalna ograda oko džamije u ulici Nalina u dužini od 54 m, visine 110 cm i reparirana postojeće kapija. Realizaciju ovog Projekta u iznosu od 17.836,29 KM finansirala je Općina, a izvođač radova bio je Fadž-Company.

Saniran podzid u Žaglićima

Završena je sanacija starog potpornog zida u Žaglićima. Ovaj zid se urušio u zimskom periodu, uslijed vremenskih nepogoda i jakih oborinskih voda, te je Općina prioritetno pristupila njegovoj sanaciji. Pri izgradnji se vodilo računa da se sačuva autentičnost podzida, jer se radilo o starom kamenom zidu. Izvođač radova je bila firma „BOSMAN“ d.o.o. Sarajevo, a realizaciju projekta u vrijednosti od 9.810,00 KM finansirala je Općina Stari Grad.

Izgrađene niše za kontejnere

Izgradnja natkrivenih niša za kontejnere na području Općine Stari Grad, koja je počela u maju, završena je sredinom juna. Izgrađene su natkrivene niše za kontejnere u ulicama: Nalina, Kačanik 1, Kačanik 2, Safvet-bega Bašagića, Sedrenik i Boguševac. Radovi su se odvijali u dvije faze. Prva faza je podrazumijevala kompletnu građevinsku radove, a druga montažerske sa postavljanjem metalnih elemenata, cijevi i mreža, te limenih pokrivača koji štite kontejnere od padavina i širenja neugodnih mirisa. Izvođač radova je bio KJKP „Rad“, a realizaciju projekta u vrijednosti od 22.000,00 KM finansirala je Općina.



Spomen obilježje u MZ Vratnik

Obilježavanja

Obilježen 2. maj, Dan Općine Stari Grad

Tog dana spriječeno je presijecanje Sarajeva na dva dijela što bi bilo kobno za odbranu Grada

Sakib Avdibegović, pomoćnik načelnika za boračko-invalidsku zaštitu; Suad Berbić, savjetnik načelnika; Emin Kapo iz službe za boračko-invalidsku zaštitu, te predstavnici boračkih udruženja u Starom Gradu, položili su vijence na spomen obilježja šehidima i poginulim borcima. Posjećena su spomen obilježja: Baščaršija, Babića bašča, Bistrik, Ferhadija, Logavina, Medrese, Sumbuluša, Kovači i Sedrenik, Mošćanica, Vratnik, Širokača, Toka-Džeka, Mahmutovac, Hrid-Jarčedoli i Mjedenica. Učenjem dove odata je počast svim šehidima, herojima odbrane i istaknutim komandantima jedinica naše Općine na šehidskom mezarju Kovači.



Posjeta ugroženim kategorijama

Posjeta porodicama šehida i poginulih boraca, RVI i demobilisanim borcima

Načelnik Ibrahim Hadžibajrić, pomoćnik načelnika za boračko-invalidsku zaštitu Sakib Avdibegović, savjetnik Ismet Hadžić, viši stručni saradnik za zdravstvenu zaštitu u Službi za boračko-invalidsku zaštitu Zarifa Marić, te predstavnici boračkih organizacija, posjetili su porodice šehida i poginulih boraca, RVI i demobilisane borce. Delegacija je posjetila šehidske porodice Peljto Mehmeda i Karić Azize, RVI Bešlija Adila i Alađuz Rusmira, te demobilisane borce Grabovica Muhameda i Šuvalija Avdulaha. Tokom kućnih posjeta, navedenim licima su uručene novčane hederje i prehrambeni paketi.



Prvi red: Mustafa Mujezinović, Ivica Šarić, Besim Mehmedić i Mustafa Cuplov

Presudne bitke u odbrani grada vođile su se 2. maja 1992. godine i to je najznačajniji datum iz novije historije Sarajeva. Tog dana spriječeno je presijecanje Sarajeva na dva dijela što bi bilo kobno za

odbranu grada. Delegacija Općine Stari Grad, koju su činili pomoćnici načelnika i općinski vijećnici, predvođeni načelnikom Ibrahimom Hadžibajrićem, polaganjem cvijeća i učenjem Fatife na mezarima ve-

likana, obilježili su 2. maj, Dan Općine Stari Grad. Kao i svake godine, i ove je posjećen mezar Isa-bega Ishakovića osnivača Sarajeva, turbe najvećeg vakifa Gazi Husrev-bega koji je podigao gotovo

sve što danas vidimo na Baščaršiji, te je odata počast i proučena fatiha na Kovačima na mjestu gdje leži veliki broj naših šehida i prvi predsjednik RBiH, rahmetli Alija Izetbegović.

Svečana sjednica Općinskog vijeća

Svečana sjednica Općinskog vijeća Stari Grad, u povodu Dana Općine, održana je 18.maja u velikoj Sali Općine, u prisustvu velikog broja uglednih zvanica. Nakon intoniranja himne BiH, sjednicu je otvorio i prisutne pozdravio predsjedavajući Općinskog vijeća Rizah Avdić koji se u svom obraćanju osvrnuo na historijski značaj 02. maja:

„Drugi maj 1992.godine je historijski datum otpora, kada su građani Starog Grada i Grada Sarajeva, predvođeni pripadnicima MUP-a i Specijalne policije, Teritorijalne odbrane, Patriotske lige, Zelenih beretki i drugim, spriječili prodor agresorskih vojnih i pravojnih formacija u samo srce Sarajeva i BiH. Danas dodjeljujemo priznanja i čest živim, a nezaborav, vječni rahmet i mir poginulim borcima i civilima Starog Grada,“ rekao je predsjedavajući Avdić.

U kulturno-zabavnom dijelu programa goste su zabavljali Eldin Huseinbegović, Aid Rifatbegović (autor suvenira „Sarajevska kocka“ i pjesme „Sarajevo, stara čaršija“) i KUD „Baščaršija“, a program su vodili Ljiljana Smailbegović i Tarik Helić.



Šemsudin Džeko i Midhat Kulo sa uposlenicima punkta

Turističko-informativni punkt u Saračima

Presijecanjem vrpce svečano je otvoren Turističko-informativni punkt Turističke zajednice Kantona Sarajevo, u ulici Sarači br.58. Riječ je o zajedničkom projektu Općine Stari Grad, koja je ustupila prostor u Saračima, i TZ Kantona Sarajevo koja je renovirala i opremila punkt.

Koliki je značaj otvaranja novog turističkog punkta u Starom Gradu najbolje ilustruju najnoviji statistički podaci o posjeti turista KS u prva tri mjeseca ove godine. Naime, Kanton Sarajevo u

periodu januar-mart 2010. godine posjetilo je 35.676 turista iz 92 države svijeta. Prosječno zadržavanje turista bilo je 2 noćenja, a Općina Stari Grad, po broju noćenja, zauzima drugo mjesto u Kantonu Sarajevo.

Svečanu vrpcu presjekli su načelnik Općine Stari Grad Ibrahim Hadžibajrić i predsjednik Turističke zajednice Kantona Sarajevo Midhat Kulo.

Turističko-informativni punkt će raditi svakodnevno od 08:00 do 21:00 sat.

Druženje i podjela hedija

U velikoj sali Općine Stari Grad upriličeno je druženje sa članovima porodica šehida i poginulih boraca, te ratnim vojnim invalidima i demobilisanim borcima u povodu obilježavanja Dana Općine. Druženju i podjeli hedija u iznosu od 100 KM, prisustvovalo je 100 članova porodica šehida i poginulih boraca, 100 RVI i 50 demobilisanih boraca iz Starog Grada. U ime općine prisutnima su se obratili načelnik Ibrahim Hadžibajrić i pomoćnik načelnika za boračko-invalidsku zaštitu Sakib Avdibegović.



Veliki broj učesnika turnira

8. tradicionalni karate turnir „Stari Grad“

Obilježavanje Dana Općine počelo je 18. aprila 2010. godine, u KSC Vogošća, održavanjem 8. Tradicionalnog karate turnira „Stari Grad 2010“. Na turniru je učestvovalo 19 klubova iz BiH, sa ukupno 250 takmičara, i to od pionira do seniora. Turnir je organizovao karate klub „Stari Grad“, a otvorio Predsjedavajući Općinskog vijeća Stari Grad Rizah Avdić. Prilikom otvorenja dodjeljene su zahvalnice za doprinos u radu karate kluba „Stari Grad“ dodjeljene su zahvalnice: Općini Stari Grad, Općinskom vijeću, načelniku Ibrahimu Hadžibajriću, predsjedavajućem OV Rizahu Avdiću i Komisiji fizičku kulturu i sport OV Stari Grad.



Ekipa koja je otvorila turnir

9. memorijalni turnir u malom nogometu

U organizaciji Udruženja porodica šehida i RVI Starog Grada, održan je 9. memorijalni turnir u malom nogometu „Šehidima, poginulim borcima i ratnim vojnim invalidima“.

Predstavnici Udruženja, Općine Stari Grad i učenici osnovnih škola su, prije početka turnira, proučili hatma dovu svim šehidima i položili cvijeće na spomen-obilježje na Kovačima, kao i na mezaru rahmetli Alije Izetbegoviću.

Na turniru je učestvovalo 6 ekipa iz osnovnih škola sa područja Starog Grada i 6 ekipa seniora koje čine ratni vojni invalidi, demobilisani borci, predstavnici Fonda memorijala, vatrogasci i dr. Turnir je odigran na sportskom terenu OŠ „Hamđija Kreševljaković“.



Jusuf Pušina, Mustafa Mujezinović,
Ibrahim Hadžibajrić, Željko Komšić

Obilježena 18. godišnjica postrojavanja Brigade policije „Stari Grad“

Povodom 18. godišnjice postrojavanja I Brigade policije „Stari Grad“ Sarajevo i u okviru bilježavanja Dana Općine Stari Grad, na spomen ploči na Trgu Oslobođenja Alije Izetbegovića, 18.maja su položeni vijenci i cvijeće u znak sjećanja na poginule policajce K MUP-a i F MUP-a BiH.

Ismet Dahić, komandant I Brigade policije „Stari Grad“, Enes Bezdrob, načelnik policije i Vahid Karavelić, ratni komadant I korpusa AR BiH podsjetili su okupljene građane na Trgu Oslobođenja



Prisustvovali i predstavnici OS BiH

Alije Izetbegovića na Prvo postrojavanje 1. Brigade policije, 18. maja 1992.

Obilježavanju 18. godišnjice postrojavanja I Brigade „Stari Grad“ prisustvovao je veliki broj zvaničnika i gostiju, među kojima i član predsjedništva BiH, Željko Komšić; premijer FBiH, Mustafa Mujezinović; premijer KS, Besim Mehmedić; načelnik Općine Stari Grad Ibrahim Hadžibajrić; ministar za boračka pitanja KS Hajrudin Ibrahimović; ministar zdravstva KS Mustafa Cuplov i mnogi drugi zvaničnici.

Obilježavanja

„Dani škole - Danu Općine“



Učesnici programa

U Domu kulture „Vratnik“ održana je manifestacija „Dani škole - Danu Općine“ u kojoj su učestvovale sve osnovne škole sa područja Starog Grada. Škole su se predstavile različitim programima:

- OŠ „Mula Mustafa Bašeskija predstavila se pjesmom „Moja domovina“
- OŠ „Vrhbosna“ igrokazom „Pobuna u šumi“ i folklornom tačkom „Igre iz Teslića“
- OŠ „Šejh Muhamed ef.

Hadžijamaković“ upriličila je igrokaz „Čoban i princeza“ i plesnu izvedbu

- OŠ „Saburina“ predstavila se dramskim prikazom „Proljeće“ i muzičkom tačkom „Velim i postojim“

- OŠ „Hamdija Kreševljaković“ - učenice ove škole izvele su plesnu tačku u modernom ritmu

- OŠ „Edhem Mulabdić“ izvela je recital „Hej, potoče“ a hor pjesmu „Mi idemo, ljubav ide“

“Priateljstvo iznad svega” u izvedbi teatarske grupe „FACE“

U Domu kulture „Logavina“ održane su predstave u izvedbi teatarske grupe „FACE“, za sve učenike osnovnih škola sa područja Starog Grada. Predstava „Priateljstvo iznad svega“, izvedena je u dva termina: u prvom terminu za učenike OŠ „Mula Mustafa Bašeskija“, OŠ „Saburina“ i OŠ „Hamdija Kreševljaković“, a u drugom za OŠ „Vrhbosna“, OŠ „Šejh Muhamed ef. Hadžijamaković“ i OŠ „Edhem Mulabdić“. Teatarska grupa „FACE“ je udruženje mladih umjetnika, osnovano 2008. godine, s ciljem afirmacije scenskih umjetnosti kod mladih umjetnika sa završenom Akademijom scenskih umjetnosti.

Baletska predstava i kolažni program JU Centar za kulturu „Sarajevo“

Povodom Dana Općine Stari Grad, JU Centar za kulturu „Sarajevo“ organizovala je dva programa. Učenici Osnovne muzičke škole „Mladen Pozajić“ Sarajevo, izveli su dječiju baletsku predstavu „Vila lutaka“ Josefa Bayera, u velikoj sali Centra za kulturu, Jelića br.1. Predstava je izvedena za učenike OŠ „Mula Mustafa Bašeskija“. Na istom mjestu održan je i kolažni program u okviru kojeg su nastupili učenici osnovnih škola koji su izveli predstave, moderne plesove, baletske tačke, itd. Također, pred prepunom salom nastupio je i dječiji hor „Princes krofne“, a nastup su imali i članovi KUD „Baščaršija“.

U posljednja tri mjeseca zasađeno šest lipa

Sve više ambasadora izražava želju za sadnjom lipe u Aleji ambasadora ● Nakon sadnje, ambasadorima uručeni certifikati

U protekla tri mjeseca šestorica akreditovanih ambasadora u BiH, zasadi su lipe u Aleji ambasadora.

Ambasador Kraljvine Saudijske Arabije u BiH, nj.e. Eid Mohammed Al-Thakafi, 06.maja je u prisustvu velikog broja medija, zasadio 88. lipu u Aleji ambasadora.

Ambasador Islamske Republike Pakستان, nj.e. Jauhar Seleem, ambasador Švicarske Konfederacije, nj.e. Rolf Lenz i ambasador Republike Makedonije, nj.e. Rami Rexhepi lipe su posadili 17.maja.

Ambasador Države Kuvajt, nj.e. Mohammad Khalaf i ambasador Republike San Marino, nj.e. Michelle Chiaruzi lipe su posadili 28.maja 2010. godine.

U sadnji lipa, ambasadorima su se pridružili: načelnik Općine Stari Grad Ibrahim Hadžibajrić, predsjedavajući Općinskog vijeća Rizah Avdić i njegov zamjenik Mustafa Lačević, te stručni saradnik Alija Ibrović. Nakon sadnje, svim ambasadorima su uručeni certifikati kao podsjetnice, odnosno pozivnice da i nakon isteka mandata u našoj državi ponovo posjete Općinu Stari Grad i grad Sarajevo. Broj zasađenih lipa u Aleji trenutno iznosi 93.



Rizah Avdić i Mohammad Khalaf

Uređenje javnih površina

Projekat hortikulturnog uređenja javnih površina na području Starog Grada uspješno je proveden. Općina je potpisala Ugovor sa JKP „Park“ d.o.o. Sarajevo o uređenju zelenih površina na tri lokacije, i to: zelena površina oko „Osman-gazi Bursa sebilja“; zelena površina preko puta Slovenske ambasade; At Mejdan (lokacija kod kombi stanice)



Ibrahim Hadžibajrić, Rami Rexhepi, Jauhar Seleem, Rolf Lenz



Rizah Avdić i Michelle Chiaruzi



Ibrahim Hadžibajrić i Eid Mohammed Al-Thakafi

Na sve tri lokacije uklonjen je korov, očišćena i poravnana površina. Preko puta Slovenske ambasade i kod "Osmangazi Bursa sebilja" posadeno je cvijeće, dok je na površini kod kombi stanice na At mejdanu posadena "živa ograda".

Realizaciju projekta hortikulturnog uređenja javnih površina u vrijednosti od 10.000,00 KM finansirala je Općina.

Sjećanje na naše kolege

U relativno kratkom vremenskom periodu kolektiv Općine Stari Grad Sarajevo ostao je bez svoja tri uposlenika, naših dragih prijatelja i kolega.



Alma Vatrić
(1963. – 2009.)

Preselila na Ahiret 19. novembra 2009. godine. U Općini Stari Grad bila je zaposlena od 1993. godine. Radila je u Službi za odnose s javnošću i informacioni sistem.



Lemana Tukić
(1956. – 2010.)

Preselila na Ahiret 05. februara 2010. godine. U Općini Stari Grad bila je zaposlena od 1996. godine. Radila je u Službi za tehničke poslove i obezbeđenje.



Asim Ibrahimović
(1949. - 2010.)

Preselio na Ahiret 14. juna 2010. godine. U Općini Stari Grad bio je zaposlen od 1979. godine. Radio je u Službi kabineta Načelnika.

Ovo je još jedan spomen na njih, neka je rahmet njihovim dušama.

Mladi

Općina podržala izdavanje knjige "Djeca rastu"

Općina Stari Grad podržala je izdavanje knjige "Djeca rastu", autora Šime Ešića, u cilju podrške njegovanja kulture i tradicije čitanja kod mlađih, uprkos izazovima i zamkama savremenog informatičkog doba. Knjige su podijeljene u osnovnim školama na području Općine, i to: OŠ „Edhem Mulabdić“, OŠ „Šejh Muhamed ef. Hadžijamaković“, OŠ „Saburina“, OŠ „Hamdija Kreševljaković“, OŠ „Mula Mustafa Bašeskija“ i OŠ „Vrhbosna“. Količina podijeljenih knjiga u školama, prilagođena je broju djece, a ukupno je podijeljeno 60 knjiga.

Ansambl „Bese“ održao koncert u BKC-u



„Bese“ na sceni BKC-a

Na poziv ansambla „Kolo bosansko“ 24.04.2010. godine u BKC-u je gostovao ansambl „Bese“ iz Gostivar, Makedonija. Gosti iz Gostivar su predstavili tradicionalne albanske igre i pjesme, a pored brojne publike, koncert su pratili i ugledni zvaničnici: makedonski ambasador u BiH, n.j.e. Rami Redžepi, predsjednik Zajednice Albanaca u BiH Muharem Zejnulahu, načelnik Općine Stari Grad Ibrahim Hadžibajrić i drugi. Ova posjeta i koncert predstavljaju početak saradnje između dva ansambla koji planiraju posjetu Albaniji gdje će učestvovati na tradicionalnom festivalu pjesme i folklora.

Predstava „Medo Winnie zvani Pooh“



Općina je početkom juna, od JU „Narodno pozorište“, otkupila 400 ulaznica za predstavu „Medo Winnie zvani Pooh“, namjenjenu najmlađoj populaciji. Ovom

akcijom su se željele obogatiti vannastavne aktivnosti učenika. U saradnji sa Službom za obrazovanje, kulturu i sport ulaznice su podijeljene u osnovnim školama na području Općine Stari Grad.



Učenici generacije u Starom Gradu

Diplome i nagrade za učenike generacije

U Općini je, sredinom juna, održana dodjela diploma i nagrada za učenike generacije osnovnih škola sa područja ove općine.

Načelnik Ibrahim Hadžibajrić je uručio diplome i novčane nagrade u iznosu od 300,00KM učenicima generacije sedam osnovnih škola. Učenici generacije su:

Ensar Demir, OŠ „Saburina“; Lamija Kujan OŠ „Mula Mustafa Bašeskija“; Zeid Lušija OŠ „Edhem Mulabdić“; Fatmah Al

Shurman, OŠ „Hamdija Kreševljaković“; Irma Borovina, OŠ „Šejh Muhamed ef. Hadžijamaković“; Mehmed Hodžić, OŠ „Vrhbosna“ i Xavierreff Nikola, Osnovna muzička škola „Mladen Pozajić“. Pored diploma i nagrada, svi učenici su dobili knjige i ruže, a po završetku dodjele za njih je upriličeno druženje sa načelnikom i predstavnicima Službe za obrazovanje, kulturu i sport koja je i organizovala ovaj događaj.



Sarajevski karate klub Stari Grad

SKK „Stari Grad“ osvojio devet medalja na Federalnom takmičenju

Sarajevski karate klub „Stari Grad“ 05. juna 2010. godine učestvovao je na 1. Federalnom takmičenju u tradicionalnom karateu, koji je održan u Visokom. Na turniru je učestvovalo oko 250 takmičara iz 15 karate klubova iz Bosne i Hercegovine. Sar-

ajevski karate klub „Stari Grad“ osvojio je 9 medalja, od čega 6 zlatnih, 1 srebrnu i 2 bronzone medalje. Osvajači pojedinačnih medalja su: Kapo Naila, Kapo Hana, Avdić Emina, Kamenica Namik, Kapo Merjem, Čutura Elmedina i Hodžić Alija.

Likovna radionica na At mejdanu

U organizaciji Udruženja bosansko-tursko prijateljstvo "Bosfor", 13. maja 2010. godine je na At mejdanu,



Učesnici likovne kolonije

održana likovna radionica/kolonija na temu: "Ljudska prava, suživot, koegzistencija i poštivanje prirodne i kulturne baštine BiH". Likovna radionica/kolonija bila je namijenjena profesorima i učenicima likovnih sekcija šest osnovnih škola s područja Općine Stari Grad. Učesnici kolonije na At mejdanu tog dana su naslikali dvadesetak radova, koji su izloženi 28. maja 2010. godine na Milodražu, gdje su izabrani najbolji radovi.

Povod održavanja radionice je obilježavanje Dana Kantona Sarajevo, Općine Stari Grad i Sultan Fatihe Ahmetname 2010. Podršku u realizaciji projekta dalo je Ministarstvo obrazovanja i nauke Kantona Sarajevo, Općina Centar i Općina Stari Grad Sarajevo.

Olimpijski umjetnici u Svrzinoj kući

NVO „Sarajevska tribina“, u saradnji sa Svjetskom asocijacijom za Lijepu olimpijsku umjetnost (OFAA) i ZOI 84, organizovala je veliku izložbu likovnih umjetnika iz 28 zemalja svijeta pod nazivom „Oživljavanje olimpijskog duha u BiH“. Ovaj kulturni događaj je trajao od 1-4 juna u Sarajevu i Banja Luci kroz druženja i izložbe umjetnika koji su dobili olimpijske medalje za kulturu. Domaćin olimpijskih umjetnika 03. juna je bila Općina Stari Grad, odnosno načelnik Ibrahim Hadžibajrić. Za umjetnike je, u saradnji sa Turističkom zajednicom Kantona Sarajevo, pri-


premljen obilazak Starog Grada. Ispred Umjetničke galerije BiH, dočekali su ih vodiči koji su ih poveli u obilazak i upoznali sa najznačajnijim kulturno-historijskim znamenitostima. Obilazak je završen u Svrzinoj kući gdje je umjetnike dočekao načelnik Hadžibajrić. Uz riječi dobrodošlice Načelnika, umjetnici su posluženi tradicionalnim jelom (ćevapi), kolačem (baklava), kafom i šerbetom.

U okviru ovog projekta u Sarajevu su se okupili umjetnici iz Argentine, Austrije, Švedske, Finske, Libana, Južne Koreje i SAD-a.



Olimpijski umjetnici iz 28 zemalja

Sjećanje na hadži-šejh Fejzulaha ef. Hadžibajrića



F e j z u l a h Hadžibajrić je rođen 12.01.1913. godine u Sarajevu na Hridu, a potom se preselio u ulicu Toplik kod Hadžijske džamije.

Ništa ne biva slučajno, bez Božijeg određenja, što je odredilo i njegov karakter - tvrd i istrajan kao Hrid, blagonaklon prema Božijim stvorenjima – mahlukatu, i kao Toplik, hodočastan, kao mnoge Sarajlije, koje je u velikom broju isprao na hadž ispred Vekil Harčove –Hadžijske džamije...

U početku je, kako su Hadžibajrići nadaleko poznati kuhari-aščije, radio u porodičnoj aščinici. Rano je shvatio da su veliki kuhari oni koji streef ukus većine, ali on je to prevazišao u namjeri i mučnom i dugotrajnom naporu da zadobije zadovoljstvo-rizaluk Božiji.

Tiho i nemetljivo, onako kako je on radio, ostavio je značajnog traga na Katedri za historiju i Gazi Husrevbegovojo biblioteci, te vratio Sinanovu tekuju u okrilje Islamske zajednice.

Fejzulah je arapska riječ i znači Božija darežljivost, Božja milost, stoga je, pored ostalog, kao Mesnevihan, podario na bosanskom jeziku prevod Mesnevije, autora hazreti Mevlane, Džemaluddina Rumija. Pred preseljenje na ahiret ostavio je Fejzulah-efendija izun na „Mesneviju“ hadži hafiz Halidu ef. Hadžimuliću. I ova silsila-lanac predaje je vezana za krug-halku.

Meni je odredio studijsku grupu predmeta: turski, arapski i perzijski jezik. Od njega sam naučio pored ostalog i značenje perzijske riječi pejgamber: pey-stopra, trag; gamber-ostaviti. Ostavio je trag i na mene, onaj trag što na ljudskost miriše.

„Smrt je kapija kroz koju će svi proći, i sultan i čobanin“. Takva je bila i njegova dženaza kojoj je prisustvovao ogroman broj dostojanstvenih ljudi, od prosjaka do Prvog predsjednika Predsjedništva BiH.

Od rođenja je gledao sa Hrida u Faletiće, gdje je porodično mezarje Hadžibajrića u kojem je i on našao smrrij. Dana 21. aprila 2010. navršilo se 20 godina od preseljenja na ahiret dragog, plemenitog i poštovanog hadži-šejh Fejzulaha ef. Hadžibajrića.

Neka se Mašuk i ašik nađu u Ašku, a njegove srodnike i dostove neka Allah nagradi saburom!

Alija Ibrović
dipl. orijentalist

Predstavljamo mjesne zajednice

Širokača




Mjesna zajednica Širokača se nalazi na južnoj strani Općine Stari Grad, a naseljena je sa 3120 stanovnika. Većina ulica MZ Širokača nastale su u prvoj polovini 16 vijeka, i izgrađene su u orientalnom stilu. Takve ulice su: Brdo Džamija, Brdo Sokak, Tandareva, Balibegovica, Terzibašina i Hadžiabdinica. Ulice poput Hambine Carine i Komatin

Savjet Mjesne zajednice

1. Sena Sofić, predsjednik
2. Edib Lalić, član
3. Omer Gežo, član
4. Nezir Agić, član
5. Esad Omerović, član
6. Enes Telaković, član
7. Kemo Dževlan, član

datiraju još iz srednjeg vijeka kao seoski uređene zajednice, do dolaska Osmanlija kada postaju glavne saobraćajnice, a na Hambinoj Carini uspostavljena je džumrukhana ili carina. Ulica po kojoj MZ nosi ime je ulica Derviša Numića, poznatija kao Širokača, vjerovatno zbog prirodne širine gornje dionice, koja je činila neku vrstu trga. Širokača datira još iz srednjeg vijeka i predstavlja jednu od najstarijih saobraćajnica u gradu. Naziv ulice se često mijenja, a naziv Za Beglukom datira iz 1910. godine što je imalo poseban historijski značaj, s obzirom da je u neposrednoj blizini bio stari begluk-



saraj, rezidencija bosanskih sandžak begova i valija. Mjesno područje je bogato brojnim građevinama od velikog historijskog značaja, a neke od njih su:

- mezarje Hambina carina sa spomen obilježjem šehidima i poginulim borcima
- džamija Balibegovica čiji je osnivač Balibeg, 1475. godine
- džamija Brdodžamija čiji je osnivač Kadi Hasan efendija, 1602. godine
- džamija Karaferhatova u ulici Za Beglukom, čiji je osnivač Mustafa efendija Karaferhatović, 1557. godine
- džamija hadži Memijina mahala u ulici Komatin čiji je osnivač hadži Memija, 1557. godine
- džamija Terzibašina čiji je osnivač hadži Alija, 1524. godine
- džamija Sinan Halife Voloder u ulici Goloderica, osnovana 1528. godine
- džamija u ulici Žagrići osnovana 1544. godine
- austro-ugarske kockice u ulici Šumarska sagrađene 1909. godine

Sjedište:
Telefon:
Sekretar MZ:
e-mail:

Ul Za Beglukom br.65
033 410 804
Husein Holjan
mz.sirokaca@starigrad.ba



Elaborat stanja u ulicama **Luledžina i Oprkanj**

Baščaršija je kao kulturno-historijsko jezgro grada preživjela velika razaranja tokom prošlog rata • Baščaršiji vratiti epitet turističkog dragulja...

Baščaršija, srce grada. Izgrađena u davnom XV stoljeću, kada je Isa beg Ishaković osnovao cijeli grad, razvila se u historijski i kulturni centar Sarajeva. Njeno ime ima značenje „glavna čaršija“ i označava prostor baščarskog trga oko sebilja, da bi se kasnije naziv proširio na cijelu današnju Staru sarajevsku čaršiju. Najvažniji kulturni, historijski i vjerski objekti Sarajeva nalaze se na Baščaršiji. Upravo zbog toga, kao i zbog njene specifične atmosfere, topline i nenadmašne ljepote, danas je Baščaršija glavna turistička atrakcija grada Sarajeva.

Prema podacima za prvi pet mjeseci 2010. godine, u Sarajevo su stizali turisti iz čak 100 zemalja svijeta, a od januara do maja ih je u Šeheru bilo više od 78 000.

Iz Turističke zajednice Kantona Sarajevo poručuju da je ovo rekordna godina jer se bilježi porast dolazaka turista za 19,1%. Sasvim je izvjesno da je veliki broj ovih turista (ako ne i svi) posjetio starogradsku ljepoticu Baščaršiju.

Nažalost, Baščaršija je kao kulturno-historijsko jezgro grada preživjela velika razaranja tokom prošlog rata. Neke rane još nisu zarasle, tako da su dijelovi Čaršije oštećeni, devastirani, porušeni. U želji da se Baščaršiji vrati epitet turističkog dragulja BiH, koji joj sasvim sigurno i pripada, Općina Stari Grad je pokrenula aktivnosti u cilju vraćanja starog sjaja Čaršiji. Zajedničkim radom Službe za urbanizam, Službe za imovinsko-pravne, geodetske poslove i katastar, te Službe za privredu Općine Stari Grad, urađen je elaborat o stanju objekata u ulicama Luledžina i Oprkanj. Izradu ovog elaborata naložio


je načelnik Ibrahim Hadžibajrić u nastojanju da se ponovo stave u funkciju devastirani prostori u pomenutim ulicama koji i 15 godina nakon završetka rata nisu osposobljeni. Vraćanje u funkciju ovih objekata ne samo da bi doprinijelo uređenju Baščaršije, nego bi, dugoročno, značilo i dobit za Općinu Stari Grad. Uvidom u stanje na terenu utvrđeno je da se u ovim ulicama nalazi ukupno 20 objekata, od kojih su neki obnovljeni i u funkciji, neki su u pripremi, neki su zatvoreni i urušeni, a neki potpuno srušeni i na njihovom mjestu se nalazi parking za vozila. Općina će nastojati da u narednom periodu, pridržavajući se regulacionog plana Baščaršije, objekte u ovim ulicama dovede u funkciju i vrati ulicama stari sjaj. U nastavku ovog priloga donosimo vam kompletan elaborat i kopiju katastarskog plana sa ucrtanim predmetnim objektima.

Elaborat stanja u ulicama Luledžina i Oprkanj

Rbr.	ADRESA	k.č.		POSEDOVNO STANJE	TRENUTNA NAMJENA	NAPOMENA
		stari premjer	novi premjer			
1.	Luledžina br.1	k.č.6 Mahala XXIV k.o.Sarajevo	k.č. 365 k.o.Sarajevo I	Prema kopiji katastarskog plana kao posjednik je upisana Općina Stari Grad na površini od 23 m ² . Kao vlasnik u ZK izvadku upisan je Narodni odbor Općine Centar	Objekat je renoviran i adaptiran i planira se skoro otvaranje slastičarne	<ul style="list-style-type: none"> • Prema podacima Službe za privredu postoje dugovanja po osnovu zakupa u iznosu od 252,72 KM, nije pokrenut sudski spor, zakupac je „The club“ • Služba za imovinsko-pravne, geodetske poslove i katastar će provesti postupak promjene nosioca prava raspolažanja, donijeti rješenje i upisati Općinu Stari Grad sa pravom raspolažanja
2.	Luledžina br.3	k.č.5 Mahala XXIV k.o.Sarajevo	k.č. 366/1 k.o.Sarajevo I	Prema kopiji katastarskog plana kao posjednik je upisan Fočo Avdija i Sulejmanović Hamdija. Pravo vlasništva na nekretninu na površini od 22,6m ² ima Bašović Bećir	Objekat je u funkciji sa namjenom ugostiteljstva - caffe „DIBEK“. Objekat se nalazi na dvije navedene k.č.	Objekat upisan u registar spomenika kulture zbog svoje historijske vrijednosti
3.	Luledžina br.3	k.č.4 Mahala XXIV k.o.Sarajevo	k.č. 366/2 k.o.Sarajevo I	Prema kopiji katastarskog plana kao posjednik je upisan Halilbašić Ešref. Pravo vlasništva na nekretninu na površinu od 23,5m ² ima Bašović Bećir		
4.	Luledžina br.5	k.č.3 Mahala XXIV k.o.Sarajevo	k.č. 367 k.o.Sarajevo I	Prema kopiji katastarskog plana kao posjednik je upisana Išmić Senada. Pravo vlasništva na nekretninu na površinu od 25,6m ² ima Išmić Senada	Objekat je zatvoren, prema informacijama dobivenim anketiranjem prilikom uviđaja na terenu koristi se kao prostor skladišta	Objekat upisan u registar spomenika kulture zbog svoje historijske vrijednosti
5.	Luledžina br.7	k.č.2 Mahala XXIV k.o.Sarajevo	k.č. 368 k.o.Sarajevo I	Kao vlasnik i posjednik je upisana Općina Stari Grad na površini od 32m ²	Objekat nije u funkciji. Krov objekta je urušen. Potrebna je rekonstrukcija krova objekta	<ul style="list-style-type: none"> • Prema podacima Službe za privredu postoje dugovanja po osnovu zakupa u iznosu 814,68KM, nije pokrenut sudski spor, zakupac je Krupalija Amra
6.	Luledžina br.9	k.č.30 Mahala XXIV k.o.Sarajevo	k.č. 369 k.o.Sarajevo I	Prema kopiji katastarskog plana kao posjednik je upisan Nući Hasan. Pravo vlasništva na nekretninu na površinu od 52,8m ² ima Kovačević Bećir	Objekat je zatvoren, prema informacijama dobivenim anketiranjem prilikom uviđaja na terenu koristi se kao prostor skladišta za susjedni ugostiteljski objekat	Objekat upisan u registar spomenika kulture zbog svoje historijske vrijednosti
7.	Luledžina br.11	k.č.29 Mahala XXIV k.o.Sarajevo	k.č. 370 k.o.Sarajevo I	Prema kopiji katastarskog plana kao posjednik je upisan Hadžibajrić Ferid. Pravo vlasništva na nekretninu na površinu od 33,9m ² ima Balić Emira i Muzurović Lejla	Objekat je u funkciji i koristi se kao frizerski-brijaci salón	Objekat upisan u registar spomenika kulture zbog svoje historijske vrijednosti
8.	Luledžina br.13	k.č.27; 28 Mahala XXIV k.o.Sarajevo	k.č. 371 k.o.Sarajevo I	Prema kopiji katastarskog plana kao posjednik je upisana Općina Stari Grad. Pravo raspolažanja u ZK izvadku na k.č.28 na površini od 24 m ² ima Općina Stari Grad. U ZK izvadku na k.č.27 upisano je vlasništvo na ime Sulejmanović Mujaga, na površini od 37 m ²	Na navedenoj parceli ne postoji objekat. Parcila se koristi za parkiranje vozila	<ul style="list-style-type: none"> • Prema podacima Službe za privredu na k.č.28 postoje dugovanja po osnovu zakupa u iznosu 13.448,64KM, nije pokrenut sudski spor, zakupac je Letić Rešad. • Služba za imovinsko-pravne, geodetske poslove i katastar će provesti poslove nacionalizacije i donijet će još jedno rješenje kojim će isplaniti predmetni objekat i utvrditi kulturu gradilište po službenoj dužnosti. • Nakon što Služba za imovinsko-pravne, geodetske poslove i katastar obavi navedene radnje, s obzirom da se prema R.P. na predmetnoj lokaciji predviđaju samo radovi restauracije postojećeg objekta, a stvarno stanje na terenu je da ne postoji objekat, Služba za urbanizam će zatražiti mišljenje Zavoda za planiranje razvoja KS kojim će se tražiti dozvoljeni obim radova na predmetnoj parceli s obzirom na navedene činjenice
9.	Luledžina	k.č.26 Mahala XXIV k.o.Sarajevo	k.č. 398/2 k.o.Sarajevo I	Prema kopiji katastarskog plana kao posjednik je upisana firma Vladimir Perić Valter na površini od 33 m ² . Pravo raspolažanja u ZK izvadku ima Općina Stari Grad	Objekat je zatvoren i ne koristi se	

Rbr.	ADRESA	k.č.		POSEDOVNO STANJE	TRENUTNA NAMJENA	NAPOMENA
		stari premjer	novi premjer			
10.	Luledžina	k.č.24 Mahala XXIV k.o.Sarajevo	k.č. 398/1 k.o.Sarajevo I	Prema kopiji katastarskog plana kao posjednik je upisana Općina Stari Grad na površini od 33 m ² . Pravo raspolažanja u ZK izvadku ima Općina Stari Grad	Objekat nije u funkciji. Objekat je u ruševnom stanju. Potrebna je potpuna rekonstrukcija objekta	<ul style="list-style-type: none"> • Prema podacima Službe za privredu postoje dugovanja po osnovu zakupa u iznosu 70.733,32KM, postoji sudsko rješenje o izvršenju, zakupac je Ljutović Fahrudin
11.	Luledžina	k.č.21 Mahala XXIV k.o.Sarajevo	k.č. 397 k.o.Sarajevo I	Prema kopiji katastarskog plana kao posjednik je upisana Općina Stari Grad na površini od 77 m ² . Kao vlasnik u ZK izvadku upisana je Općina Stari Grad	Objekat je „podijeljen“ na tri dijela. Prvi dio objekta se koristi kao bazar-suvenirnica i spratnosti je P+M. Drugi dio objekta je zatvoren, spratnosti P. Treći dio objekta nije u funkciji jer je krov nad navedenim dijelom objekta urušen, spratnosti P. Potrebna je rekonstrukcija krova nad dijelom objekta	<ul style="list-style-type: none"> • Prema podacima Službe za privredu postoje dugovanja po osnovu zakupa u iznosu 7.392,00KM, postoji sudsko rješenje o izvršenju, zakupac je Ismet Feraget
12.	Luledžina	k.č.18 Mahala XXIV k.o.Sarajevo	k.č. 396 k.o.Sarajevo I	Prema kopiji katastarskog plana kao posjednik je upisana Općina Stari Grad na površini od 84 m ² . Kao vlasnik u ZK izvadku upisana je Općina Stari Grad	Objekat ima namjenu galerijskog prostora sa povremenom izložbenom postavkom. Objekat je od historijsko-kulturnog značaja jer je u njoj prebivao Mak Dizdar. Objekat je podijeljen u dva dijela i to veći dio je Energoinvest galerija , a manji dio je objekat u funkciji. Ujedno je konstatovano da su izvedeni radovi bespravnog nadzidivanja i da je na objektu potrebno izvesti radove tekućeg održavanja-radovi malterisanja i bojenja fasade	<ul style="list-style-type: none"> • Prema podacima Službe za privredu jedan dio koristi Fondacija Ibro Spahić nema dugovanja. Drugi dio koristi objekta koristi Huseinović Sead, postoje dugovanja po osnovu zakupa u iznosu 119,76KM, nije pokrenut sudski spor
13.	Luledžina	k.č.17 Mahala XXIV k.o.Sarajevo	k.č. 395 k.o.Sarajevo I	Prema kopiji katastarskog plana kao posjednik je upisana Općina Stari Grad na površini od 49 m ² . Kao vlasnik u ZK izvadku upisana je Općina Stari Grad	Objekat je zatvoren i ne koristi se	<ul style="list-style-type: none"> • Prema podacima Službe za privredu nema dugovanja, zakupac je Fondacija Ibro Spahić
14.	Luledžina br.6	k.č.14 Mahala XXIV k.o.Sarajevo	k.č. 393 k.o.Sarajevo I	Prema kopiji katastarskog plana kao posjednik je upisan Pološka Nazim. Pravo vlasništva na nekretninu na površinu od 29,8m ² ima Pološka Behija, Pološka Ljuban i Bojić Florija	Objekat je u funkciji sa namjenom ugostiteljstva - caffe „HALVAT“	Objekat upisan u registar spomenika kulture zbog svoje historijske vrijednosti
15.	Luledžina br.4	k.č.13 Mahala XXIV k.o.Sarajevo	k.č. 389 k.o.Sarajevo I	Prema kopiji katastarskog plana kao posjednik je upisana Dinović-Grkić Fehima. Pravo vlasništva na nekretninu na površinu od 43,1m ² ima Džinović Samira, Džinović Remzija	Objekat je zatvoren i ne koristi se	Objekat upisan u registar spomenika kulture zbog svoje historijske vrijednosti
16.	Luledžina br.2	k.č.12 Mahala XXIV k.o.Sarajevo	k.č. 388 k.o.Sarajevo I	Prema kopiji katastarskog plana kao posjednik je upisana Općina Stari Grad na površini od 19 m ² . Kao vlasnik u ZK izvadku upisana je Općina Stari Grad	Objekat je zatvoren i ne koristi se	<ul style="list-style-type: none"> • Prema podacima Službe za privredu postoje dugovanja po osnovu zakupa u iznosu 842,36KM, sudski postupak pokrenut 2006.godine, zakupac je Lepara Samija
17.	Oprkanj	k.č.228 Mahala XCIII k.o.Sarajevo	k.č. 343 k.o.Sarajevo I	Prema kopiji katastarskog plana kao posjednik je upisana Općina Stari Grad na površini od 76 m ² . Kao vlasnik u ZK izvadku upisana je Općina Stari Grad	Na navedenoj parceli ne postoji objekat. Parcila se koristi za parkiranje vozila	<ul style="list-style-type: none"> • Prema podacima Službe za komunalne poslove i investicije predmetna lokacija je evidentirana radi uspostave službene evidencije prema Odluci o privremenom korištenju javnih površina. Za navedenu lokaciju se još ne naplaćuje nikakva naknada
18.	Oprkanj	k.č.12 Mahala XXV k.o.Sarajevo	k.č. 357 k.o.Sarajevo I	Prema kopiji katastarskog plana kao posjednik je upisana Općina Stari Grad	Objekat je zatvoren i ne koristi se	
19.	Baščaršija	k.č.11 Mahala XXIV k.o.Sarajevo	k.č. dio 377 k.o.Sarajevo I		Objekat ima samo sporedni ulaz iz ulice Luledžina. Objekat se koristi kao ugostiteljski objekat, a glavni pristup objektu je iz ulice Baščaršija	
20.	Baščaršija	k.č.10 Mahala XXIV k.o.Sarajevo	k.č.373 k.o.Sarajevo I	Prema kopiji katastarskog plana kao posjednik je upisana Elektrotehna na površini od 22 m ² . Kao vlasnik u ZK izvadku upisana je Općina Stari Grad	Veći dio objekta ima pristup iz ulice Baščaršija i koristi se kao prostor apoteka, dok je manjem dijelu objekta pristup iz ulice Luledžina, a navedeni prostor se ne koristi	<ul style="list-style-type: none"> • Prema podacima Službe za privredu postoje dugovanja po osnovu zakupa u iznosu 241,92KM, nije pokrenut sudski spor, zakupac je Mrkulić Saljo

Kopija katastarskog plana



Evidentirani predmetni objekti označeni oznakom od 1 do 20

1001 starogradski biser

Stara pravoslavna crkva, ili samo Stara crkva, je nezaobilazan reper u kulturno-historijskom naslijeđu Sarajeva. Crkva je posvećena Svetim Arhangelima Mihailu i Gavriliu. Smještena je u samom nukleusu Starog Grada, uz Baščaršiju, ili na prostoru nekada poznatom kao Varoš. Varoš, kao urbano naselje, spominje se još u Isa-begovoj vakufnami iz 1462. god. Valja spomenuti da u literaturi (a posebice povijesnim dokumentima) nailazimo na lokalitete Gornja i Donja Varoš, a to su Stara Varoš i Varoš. Stara Varoš kojoj je pripadalo i staro trgovište (ili torkovište) ubicirano je na širem području današnje ulice Ali-pašine, a Varoš na širem području današnje Stare crkve. Upravo na tom prostoru započet će urbanizacija kasabe Saraj, odnosno njenog poslovnog dijela – čaršije.

Sam lokalitet crkve je izrazito znakovit u kontekstu formiranja grada (Varoš – kao srednjovjekovno naslijeđe, a zatim kasaba Saraj), a posebno čaršije i nastanka same crkve. Naime, do danas nije tačno utvrđeno kada je crkva nastala. Burna povijest Sarajeva uveliko je utjecala na to da danas teško možemo sa sigurnošću kazati tačnu godinu, pa i vijek nastanka crkve. Najčešća kazivanja u smislu datiranja crkve započinju od V i VI vijeka, zatim od XII do XIV vijeka, te XV i XVI vijeka. Na osnovu pisanih spomenika (dokumenata) crkvu datiramo, ili pak crkva se prvi put spominje u sidžilu iz 1539. godine. Od ove godine sa sigurnošću možemo govoriti da je crkva bila izgrađena i to ona crkva koju i danas u dobrom dijelu i vidimo.

Da li se današnja crkva nalazi na temeljima starije crkve iz gore navedenih vijekova to je za ovaj tekst manje važno u odnosu na golemu činjenicu da Stara pravoslavna crkva spada u najstarije sakralne objekte u Sarajevu i široj okolini, te da predstavlja jedan od najbogatijih i najvažnijih kulturno-historijskih spomenika prvorazrednog značaja opšte kulturne baštine.

Vizuelni identitet crkve, kako u eksterijeru tako i enterijeru, emanira izrazitom arhaičnošću što prethodno kazivanje o dataciji čini interesantnijem. Današnja crkva, odnosno kompleks, kojeg čine zidani toranj-zvonik (podignut 1881. god.), konak i muzej (nekadašnje daire), te kapija i zid (kao zadnji ili prvi element koji čini, ili čuva, sveti prostor mirnim i intimnijim) su nastajali u nizu vijekova u kojima je čovjek gradio i razgradivao, te prilagodavao svojim potrebama arhitektonске elemente, komponirajući ih u harmoničnu cjelinu kako jedino i pristaje presvetom hramu.

O kakvom arhaičnom i izrazitom

atipičnom vizuelnom, odnosno arhitektonskom identitetu je riječ pokušat čemo u nekoliko iskaza predočiti.

Svojevrsnu atipičnost već uočavamo u tlocrtu crkve – on je svojom širinom veći od dužine. Crkva je sagradena bez istaknute apside kako to uobičajno biva u pravoslavnim hramovima. Crkva nema kupolu već krov na četiri vode s tim da iz unutrašnjosti uočavamo poluobličast svod koji snažno priziva kupolu ili pak manastirske svode. Kompletan crkveni ukop je ukopana u zemlju, odnosno pod crkve je dobrano ispod nivoa tla. Dodamo li toj činjenici da su vrata izrazito malih dimenzija (željezna vrata sa kamenim dovratnicima i lukom – koja se mogu vidjeti na čaršiji ili na starim bosanskim kućama-magazama) – sve to skupa traži lagan i smiren ulaz u

su blago zakriveni od pogleda s naosa (donjem sprata) sa mušepcima.

Sve do sada navedene karakteristike crkve su takve da nemamo često priliku nešto slično vidjeti u drugim pravoslavnim hramovima.

Jedan od najreprezentativnijih elemenata crkve je ikonostas iz XVII i XVIII vijeka na kojem su radovi (ikone i duborezi) čuvenih majstora Radula, Maksima Tujkovića i drugih. Crkva nije životpisna, te je sav likovno-umjetnički akcenat na ikonostasu i ikonama. Pored ikonostasa, u crkvi su prisutne i brojne ikone domaćih i stranih (italo-kritskih) majstora od XV do XIX vijeka. U crkvi su prisutni brojni vrijedni kujundžijski radovi kao što su kandila, okovi za ikone, te kivot (ćivot) sa svetim moštima.

Stara pravoslavna crkva (Srpska pravoslavna crkva)

hram sa blagim saginjanjem, a potom niz stepenice, spuštanje u naos crkve (ulaz u crkvu je s bočne strane).

Unutrašnji središnji prostor crkve (naos) sa sjeverne i južne strane ima bočne brodove, a sa zapada je zatvorena priprata (narteks). Unutrašnji prostor okružen je lukovima i galerijom za žene (gynaikeos) i prostire se na sva tri zida, sem onog na kojem je apsida – ti "balkoni"

Stara pravoslavna crkva, zajedno sa muzejom, je iznimno bogat i vrijedan kompleks, te predstavlja riznicu duhovnog bogatstva BiH koju je nemoguće čak ni taksativno svesti na tekst ove veličine. Iz tog razloga čemo u nekim narednim brojevima posvetiti zasebne tekstove muzeju, koji je smješten u dvorištu crkve, a koji zorno svjedoči, maločas spomenuto, duhovno bogatsvo.




Foto: Vedran Salihodžić

Sarajevska kocka u Kini

Autor zvaničnog suvenira Općine Stari Grad, Aid Rifatbegović, boravio je od 01-05.05.2010. godine u Kini, na sajmu Expo koji se održava u Šangaju (od 01.05.- 01.10.2010.).

Bila je to prilika za predstavljanje „Sarajevske kocke“ koja je naišla na veliki interes posjetilaca Sajma. Rifatbegović je u Šangaj putovao u cilju promocije zvaničnog poklona Expo sekcijs BiH, a prema njegovim riječima, na Sajmu, koji dnevno posjeti više stotina hiljada ljudi, interes za

Kocku bio je veliki. S obzirom da na Sajmu učestvuju i predstavnici bivših jugoslovenskih republika, najveće interesovanje pokazali su Makedonci koji, poznavajući dobro Sarajevo, shvataju ideju Kocke. Iz tog interesovanja rođila se i ideja za saradnjom ,tako da će Rifatbegović uraditi idejno rješenje zvaničnog Expo poklona Makedonije. Interesovanje su pokazali i Kinezi koji u svojoj tradiciji imaju zagonetne forme, te su bili oduševljeni konceptom „Sarajevske kocke“.

